

# 佛遺教三經

附：佛說無常經

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

恭錄自《印光大師文鈔三編卷四：靈巖山寺念誦儀規題辭》

# 目錄

- 佛說四十二章經……………三
- 佛垂般涅槃略說教誡經……………二七
- （亦名佛遺教經）
- 佛說八大人覺經……………四四
- 佛說無常經……………四九



後漢  
迦葉摩騰  
竺法蘭  
同譯

# 佛說四十二章經

佛陀教育基金會  
印贈



# 佛說四十二章經

後漢迦葉摩騰、竺法蘭共譯

## 經序

世尊成道已，作是思惟：離欲寂靜，是爲最勝。住大禪定，降諸魔道。於鹿野苑中，轉四諦法輪，度憍陳如等五人，而證道果。復有比丘，所說諸疑，求佛進止。世尊教敕，一一開悟。合掌敬諾，而順尊敕。

## 第一章 出家證果

佛言：辭親出家，識心達本，解無爲法，名曰沙

門。常行二百五十戒，進止清淨，爲四真道行，成阿羅漢。阿羅漢者，能飛行變化，曠劫壽命，住動天地。次爲阿那含，阿那含者，壽終靈神上十九天，證阿羅漢。次爲斯陀含，斯陀含者，一上一還，即得阿羅漢。次爲須陀洹，須陀洹者，七死七生，便證阿羅漢。愛欲斷者，如四肢斷，不復用之。

## 第二章 斷欲絕求

佛言：出家沙門者，斷欲去愛，識自心源，達佛深理，悟無爲法；內無所得，外無所求；心不繫



道，亦不結業；無念無作，非修非證；不歷諸位，而自崇最。名之爲道。

### 第三章 割愛去貪

佛言：剃除鬚髮，而爲沙門，受道法者，去世資財，乞求取足。日中一食，樹下一宿，慎勿再矣。使人愚蔽者，愛與欲也。

### 第四章 善惡並明

佛言：衆生以十事爲善，亦以十事爲惡。何等爲十？身三、口四、意三。身三者，殺、盜、婬。口四者，兩舌、惡口、妄言、綺語。意三者，嫉

、恚、癡，如是十事，不順聖道，名十惡行；是惡若止，名十善行耳。

### 第五章 轉重令輕

佛言：人有衆過，而不自悔，頓息其心，罪來赴身；如水歸海，漸成深廣。若人有過，自解知非，改惡行善，罪自消滅；如病得汗，漸有痊損耳。

### 第六章 忍惡無瞋

佛言：惡人聞善，故來擾亂者，汝自禁息，當無瞋責，彼來惡者，而自惡之。

### 第七章 惡還本身

佛言：有人聞吾守道，行大仁慈，故致罵佛。佛默不對。罵止，問曰：子以禮從人，其人不納，禮歸子乎？對曰：歸矣！佛言：今子罵我，我今不納，子自持禍，歸子身矣。猶響應聲，影之隨形，終無免離，慎勿爲惡。

### 第八章 塵唾自污

佛言：惡人害賢者，猶仰天而唾，唾不至天，還從已墮；逆風揚塵，塵不至彼，還坌己身。賢不可毀，禍必滅己。

### 第九章 返本會道

佛言：博聞愛道，道必難會；守志奉道，其道甚大。

### 第十章 喜施獲福

佛言：睹人施道，助之歡喜，得福甚大。沙門問曰：此福盡乎？佛言：譬如一炬之火，數千百人，各以炬來分取，熟食除冥，此炬如故，福亦如之。

### 第十一章 施飯轉勝

佛言：飯惡人百，不如飯一善人；飯善人千，不如飯一持五戒者；飯五戒者萬，不如飯一須陀洹。

。飯百萬須陀洹，不如飯一斯陀含；飯千萬斯陀含，不如飯一阿那含。飯一億阿那含，不如飯一阿羅漢。飯十億阿羅漢，不如飯一辟支佛。飯百億辟支佛，不如飯一三世諸佛。飯千億三世諸佛，不如飯一無念無住無修無證之者。

## 第十二章 舉難勸修

佛言：人有二十難。貧窮布施難，豪貴學道難，棄命必死難，得睹佛經難，生值佛世難，忍色忍欲難，見好不求難，被辱不瞋難，有勢不臨難，觸事無心難，廣學博究難，除滅我慢難，不輕未

學難，心行平等難，不說是非難，會善知識難，見性學道難，隨化度人難，睹境不動難，善解方便難。

### 第十三章 問道宿命

沙門問佛：以何因緣，得知宿命，會其至道？佛言：淨心守志，可會至道。譬如磨鏡，垢去明存；斷欲無求，當得宿命。

### 第十四章 請問善大

沙門問佛：何者爲善？何者最大？佛言：行道守眞者善，志與道合者大。

## 第十五章 請問力明

沙門問佛：何者多力？何者最明？佛言：忍辱多力，不懷惡故，兼加安健。忍者無惡，必爲人尊。心垢滅盡，淨無瑕穢，是爲最明。未有天地，逮於今日；十方所有，無有不見，無有不知，無有不聞，得一切智，可謂明矣。

## 第十六章 捨愛得道

佛言：人懷愛欲，不見道者，譬如澄水，致手攪之，衆人共臨，無有睹其影者。人以愛欲交錯，愛心中濁興，故不見道。汝等沙門，當捨愛欲。愛

欲垢盡，道可見矣！

### 第十七章 明來暗謝

謝，音謝，  
凋也。

佛言：夫見道者，譬如持炬，入冥室中，其冥即滅，而明獨存；學道見諦，無明即滅，而明常存矣。

### 第十八章 念等本空

念行言修等事，本來皆  
空。空，真空實相也。

佛言：吾法，念無念念，行無行行，言無言言，修無修修，會者近爾，迷者遠乎。言語道斷，非物所拘，差之毫釐，失之須臾。

### 第十九章 假真並觀



佛言：觀天地，念非常。觀世界，念非常。觀靈覺，即菩提。如是知識，得道疾矣！

## 第二十章 推我本空

推，推究也。

佛言：當念身中四大，各有自名，都無我者。我既都無，其如幻耳！

## 第二十一章 名聲喪本

佛言：人隨情欲，求於聲名；聲名顯著，身已故矣。貪世常名，而不學道，枉功勞形。譬如燒香，雖人聞香，香之燼矣，危身之火，而在其後。

## 第二十二章 財色招苦

佛言：財色於人，人之不捨。譬如刀刃有蜜，不足一餐之美；小兒舐之，則有割舌之患。

### 第二十三章 妻子甚獄

佛言：人繫於妻子舍宅，甚於牢獄。牢獄有散釋之期，妻子無遠離之念。情愛於色，豈憚驅馳？雖有虎口之患，心存甘伏，投泥自溺，故曰凡夫，透得此門，出塵羅漢。

### 第二十四章 色欲障道

佛言：愛欲莫甚於色。色之爲欲，其大無外，賴有一矣；若使二同，普天之人，無能爲道者矣。

## 第二十五章 欲火燒身

姪欲之熱情如火，故名欲火。

佛言：愛欲於人，猶如執炬，逆風而行，必有燒手之患。

## 第二十六章 天魔嬈佛

嬈，戲弄也。

天神獻玉女於佛，欲壞佛意。佛言：革囊衆穢，爾來何爲？去，吾不用。天神愈敬，因問道意。佛爲解說，即得須陀洹果。

## 第二十七章 無著得道

著，固著也

佛言：夫爲道者，猶木在水，尋流而行，不觸兩岸，不爲人取，不爲鬼神所遮，不爲洄流所住，

亦不腐敗，吾保此木，決定入海。學道之人，不爲情欲所惑，不爲衆邪所嬈，精進無爲，吾保此人必得道矣。

第二十八章 意馬莫縱

意馬者，人意驅逐於外境，譬猶奔馬，故名。

佛言：甚勿信汝意，汝意不可信。慎勿與色會，色會即禍生。得阿羅漢已，乃可信汝意。

第二十九章 正觀敵色

正觀，正念觀察也。敵，抵禦也。

佛言：慎勿視女色，亦莫共言語。若與語者，正心思念：我爲沙門，處於濁世，當如蓮華，不爲泥汙。想其老者爲母，長者如姊，少者如妹，稚

者如子，生度脫心，息滅惡念。

### 第三十章 欲火遠離

佛言：夫爲道者，如被乾草，火來須避。道人見欲，必當遠之。

### 第三十一章 心寂欲除

佛言：有人患婬不止，欲自斷陰。佛謂之曰：若斷其陰，不如斷心。心如功曹，功曹若止，從者都息。邪心不止，斷陰何益？佛爲說偈：欲生於汝意，意以思想生，二心各寂靜，非色亦非行。佛言：此偈是迦葉佛說。

### 第三十二章 我空怖滅

佛言：人從愛欲生憂，從憂生怖。若離於愛，何憂何怖？

### 第三十三章 智明破魔

佛言：夫爲道者，譬如一人與萬人戰。挂鎧出門，意或怯弱，或半路而退，或格鬥而死，或得勝而還。沙門學道，應當堅持其心，精進勇銳，不畏前境，破滅衆魔，而得道果。

### 第三十四章 處中得道

沙門夜誦迦葉佛遺教經，其聲悲緊，思悔欲退。

佛問之曰：汝昔在家，曾爲何業？對曰：愛彈琴。佛言：弦緩如何？對曰：不鳴矣！弦急如何？對曰：聲絕矣！急緩得中如何？對曰：諸音普矣！佛言：沙門學道亦然，心若調適，道可得矣。於道若暴，暴即身疲。其身若疲，意即生惱。意若生惱，行即退矣。其行既退，罪必加矣。但清淨安樂，道不失矣。

### 第三十五章 垢淨明存

佛言：如人鍛鐵，去滓成器，器即精好。學道之人，去心垢染，行即清淨矣。

### 第三十六章 展轉獲勝

佛言：人離惡道，得爲人難。既得爲人，去女即男難。既得爲男，六根完具難。六根既具，生中國難。既生中國，值佛世難。既值佛世，遇道者難。既得遇道，興信心難。既興信心，發菩提心難。既發菩提心，無修無證難。

### 第三十七章 念戒近道

佛言：佛子離吾數千里，憶念吾戒，必得道果。在吾左右，雖常見吾，不順吾戒，終不得道。

### 第三十八章 生即有滅

生滅相鄰。



佛問沙門：人命在幾間？對曰：數日間。佛言：子未知道。復問一沙門：人命在幾間？對曰：飯食間。佛言：子未知道。復問一沙門：人命在幾間？對曰：呼吸間。佛言：善哉，子知道矣！

### 第三十九章 教誨無差

差，差別也。

佛言：學佛道者，佛所言說，皆應信順。譬如食蜜，中邊皆甜；吾經亦爾。

### 第四十章 行道在心

佛言：沙門行道，無如磨牛；身雖行道，心道不行。心道若行，何用行道。

## 第四十一章 直心出欲

佛言：夫爲道者，如牛負重，行深泥中，疲極不敢左右顧視；出離淤泥，乃可蘇息。沙門當觀情欲，甚於淤泥。直心念道，可免苦矣。

## 第四十二章 達世如幻

佛言：吾視王侯之位，如過隙塵；視金玉之寶，如瓦礫；視紈素之服，如敝帛；視大千界，如一訶子；視阿耨池水，如塗足油；視方便門，如化寶聚；視無上乘，如夢金帛；視佛道，如眼前華；視禪定，如須彌柱；視涅槃，如晝夕寤；視倒

正，如六龍舞；視平等，如一真地；視興化，如四時木。



姚秦三藏鳩摩羅什譯

佛垂般涅槃畧說教誡經

亦名佛遺教經

佛陀教育基金會 印贈



佛垂般涅槃略說教誡經

亦名佛遺教經

姚秦三藏鳩摩羅什譯

一 經序

釋迦牟尼佛，初轉法輪，度阿若憍陳如；最後說法，度須跋陀羅。所應度者，皆已度訖，於娑羅雙樹間，將入涅槃，是時中夜，寂然無聲，爲諸弟子，畧說法要。

二 持戒

自二至十九  
舊作正宗分

汝等比丘！於我滅後，當尊重珍敬，波羅提木叉；如闇遇明，貧人得寶。當知此則是汝大師，若

我住世，無異此也。持淨戒者，不得販賣貿易，安置田宅，畜養人民、奴婢、畜生；一切種植，及諸財寶，皆當遠離，如避火坑。不得斬伐草木，墾土掘地。合和湯藥，占相吉凶。仰觀星宿，推步盈虛，曆數算計，皆所不應。節身時食，清淨自活。不得參預世事，通致使命；呪術仙藥，結好貴人，親厚媠慢，皆不應作。當自端心，正念求度；不得包藏瑕疵，顯異惑衆。於四供養，知量知足；取得供事，不應畜積。此則畧說，持戒之相。戒是正順解脫之本，故名波羅提木叉。



因依此戒，得生諸禪定，及滅苦智慧。是故比丘，當持淨戒，勿令毀犯。若人能持淨戒，是則能有善法。若無淨戒，諸善功德，皆不得生。是以當知，戒爲第一安隱功德之所住處。

### 三 制心

汝等比丘！已能住戒，當制五根，勿令放逸，入於五欲。譬如牧牛之人，執杖視之。不令縱逸，犯人苗稼。若縱五根，非唯五欲，將無崖畔，不可制也。亦如惡馬，不以轡制，將當牽人，墜於坑陷，如被劫害，苦止一世；五根賊禍，殃及累

世，爲害甚重，不可不慎，是故智者，制而不隨，持之如賊，不令縱逸；假令縱之，皆亦不久，見其磨滅。此五根者，心爲其主。是故汝等，當好制心。心之可畏，甚於毒蛇、惡獸、怨賊，大火越逸，未足喻也。譬如有人，手持蜜器，動轉輕躁，但觀於蜜，不見深坑。譬如狂象無鈎，猿猴得樹，騰躍蹕躑，難可禁制。當急挫之，無令放逸。縱此心者，喪人善事；制之一處，無事不辦。是故比丘，當勤精進，折伏其心。

#### 四 節食

汝等比丘！受諸飲食，當如服藥，於好於惡，勿生增減；趣得支身，以除飢渴。如蜂採華，但取其味，不損色香。比丘亦爾，受人供養，趣自除惱，無得多求，壞其善心。譬如智者，籌量牛力所堪多少，不令過分，以竭其力。

## 五 戒睡眠

汝等比丘！晝則勤心，修習善法，無令失時；初夜後夜，亦勿有廢；中夜誦經，以自消息。無以睡眠因緣，令一生空過，無所得也。當念無常之火，燒諸世間；早求自度，勿睡眠也。諸煩惱賊

，常伺殺人，甚於怨家；安可睡眠，不自警寤。煩惱毒蛇，睡在汝心；譬如黑虻，在汝室睡，當以持戒之鉤，早摒除之，睡蛇既出，乃可安眠；不出而眠，是無慚人也。慚恥之服。於諸莊嚴，最爲第一。慚如鐵鉤，能制人非法，是故比丘，常當慚恥，無得暫替；若離慚恥，則失諸功德。有愧之人，則有善法；若無愧者，與諸禽獸，無相異也。

## 六 戒瞋恚

汝等比丘！若有人來，節節支解，當自攝心，無

令瞋恨；亦當護口，勿出惡言。若縱恚心，則自妨道，失功德利。忍之爲德，持戒苦行，所不能及。能行忍者，乃可名爲有力大人。若其不能歡喜忍受惡罵之毒，如飲甘露者，不名入道智慧人也，所以者何？瞋恚之害，能破諸善法，壞好名聞，今世後世，人不喜見。當知瞋心，甚於猛火，常當防護，無令得入。劫功德賊，無過瞋恚。白衣受欲，非行人，無法自制，瞋猶可恕。出家行道，無欲之人，而懷瞋恚，甚不可也。譬如清冷雲中，霹靂起火，非所應也。

## 七 戒憍慢

汝等比丘！當自摩頭，已捨飾好，著壞色衣，執持應器，以乞自活，自見如是。若起憍慢，當疾滅之。增長憍慢，尚非世俗白衣所宜，何況出家入道之人。爲解脫故，自降其身，而行乞耶？

## 八 戒諂曲

汝等比丘！諂曲之心，與道相違；是故宜應，質直其心。當知諂曲，但爲欺誑。入道之人，則無是處。是故汝等，宜應端心，以質直爲本

## 九 少欲

汝等比丘！當知多欲之人，多求利故，苦惱亦多；少欲之人，無求無欲，則無此患。直爾少欲，尙應修習。何況少欲，能生諸功德。少欲之人，則無諂曲，以求人意，亦復不爲諸根所牽。行少欲者，心則坦然，無所憂畏。觸事有餘，常無不足。有少欲者，則有涅槃，是名少欲。

### 十 知足

汝等比丘！若欲脫諸苦惱，當觀知足。知足之法，即是富樂安隱之處。知足之人，雖臥地上，猶爲安樂；不知足者，雖處天堂，亦不稱意。不知

足者，雖富而貧；知足之人，雖貧而富。不知足者，常爲五欲所牽；爲知足者，之所憐愍，是名知足。

十一 遠離

汝等比丘！若求寂靜，無爲安樂，當離憤鬧，獨處閒居。靜處之人，帝釋諸天，所共敬重。是故當捨，己衆他衆，空閒獨處，思滅苦本。若樂衆者，則受衆惱；譬如大樹，衆鳥集之，則有枯折之患。世間縛著，沒於衆苦，譬如老象溺泥，不能自出，是名遠離。



## 十二 精進

汝等比丘！若勤精進，則事無難者。是故汝等，當勤精進；譬如小水常流，則能穿石。若行者之心，數數懈廢，譬如鑽火，未熱而息，雖欲得火，火難可得，是名精進。

## 十三 不念

汝等比丘！求善知識，求善護助，無如不念。若有不念者，諸煩惱賊，則不能入。是故汝等，常當攝念在心。若失念者，則失諸功德。若念力堅強，雖入五欲賊中，不爲所害。譬如著鎧入

陣，則無所畏，是名不忘念。

#### 十四 禪定

汝等比丘！若攝心者，心則在定；心在定故，能知世間，生滅法相。是故汝等，常當精勤，修習諸定；若得定者，心則不散。譬如惜水之家，善治堤塘。行者亦爾。爲智慧水故，善修禪定，令不漏失，是名爲定。

#### 十五 智慧

汝等比丘！若有智慧，則無貪著。常自省察，不令有失，是則於我法中，能得解脫。若不爾者，

既非道人，又非白衣，無所名也。實智慧者，則是度老病死海，堅牢船也；亦是無明黑闇，大明燈也；一切病者之良藥也，伐煩惱樹之利斧也。是故汝等，當以聞思修慧，而自增益。若人有智慧之照，雖是肉眼，而是明見人也，是爲智慧。

## 十六 不戲論

汝等比丘！若種種戲論，其心則亂；雖復出家，猶未得脫。是故比丘，當急捨離，亂心戲論。若汝欲得，寂滅樂者，唯當善滅，戲論之患，是名不戲論。

## 十七 自勉

汝等比丘！於諸功德，常當一心；捨諸放逸，如離怨賊。大悲世尊，所說利益，皆已究竟；汝等但當勤而行之。若在山間，若空澤中，若在樹下，閒處靜室，念所受法，勿令忘失。常當自勉，精進修之，無爲空死，後致憂悔。我如良醫，知病說藥；服與不服，非醫咎也；又如善導，導人善道；聞之不行，非導過也。

## 十八 決疑

汝等若於苦等四諦，有所疑者，可疾問之；毋得

懷疑，不求決也。爾時世尊，如是三唱。人無問者，所以者何？衆無疑故。時阿菴樓駄，觀察衆心，而白佛言：世尊！月可令熱，日可令冷，佛說四諦，不可令異。佛說苦諦實苦，不可令樂；集真是因，更無異因；苦若滅者，即是因滅，因滅故果滅；滅苦之道，實是真道，更無餘道。世尊！是諸比丘，於四諦中，決定無疑。

### 十九 衆生得度

於此衆中，所作未辦者，見佛滅度，當有悲感。若有初入法者，聞佛所說，即皆得度。譬如夜見

電光，即得見道。若所作已辦，已度苦海者，但作是念：世尊滅度，一何疾哉？阿菟樓駄，雖說此語，衆中皆悉了達四聖諦義。世尊欲令，此諸大衆，皆得堅固，以大悲心，復爲衆說。汝等比丘，勿懷悲惱，若我住世一劫，會亦當滅；會而不離，終不可得。自利利他，法皆具足，若我久住，更無所益。應可度者，若天上人間，皆悉已度；其未度者，皆亦已作得度因緣。

二十 法身常在

以下舊作  
流通分

自今以後，我諸弟子，展轉行之，則是如來，法

身常在，而不滅也。是故當知，世皆無常，會必有離；勿懷憂惱，世相如是。當勤精進，早求解脫，以智慧明，滅諸癡暗。世實危脆，無堅牢者，我今得滅，如除惡病，此是應捨。罪惡之物，假名爲身，沒在老病生死大海。何有智者，得除滅之，如殺怨賊，而不歡喜？

## 二十一 結論

汝等比丘！常當一心，勤求出道。一切世間，動不動法，皆是敗壞不安之相。汝等且止，勿得復語，時將欲過，我欲滅度。是我最後之所教誨。

後漢沙門安世高譯

佛說八大人覺經

佛陀教育基金會 印贈



# 佛說八大人覺經

後漢沙門安世高譯

## 一 總標

爲佛弟子，常於晝夜，至心誦念八大人覺。

## 二 別明

內分八覺

### 一 世間無常覺

一作無常  
無我覺

第一覺悟：世間無常，國土危脆，四大苦空，五陰無我。生滅變異，虛僞無主。心是惡源，形爲罪藪。如是觀察，漸離生死。

### 二 多欲爲苦覺

一作常修  
欲覺

第二覺知：多欲爲苦；生死疲勞，從貪欲起，少欲無爲，身心自在。

三 心無厭足覺

一作知足  
守道覺

第三覺知：心無厭足，唯得多求，增長罪惡；菩薩不爾，常念知足，安貧守道，唯慧是業。

四 懈怠墜落覺

一作常行  
精進覺

第四覺知：懈怠墜落，常行精進，破煩惱惡；摧伏四魔，出陰界獄。

五 愚痴生死覺

一作多聞  
智慧覺

第五覺悟：愚癡生死，菩薩常念，廣學多聞，增

長智慧，成就辯才，教化一切，悉以大樂。

六 貧苦多怨覺

一作布施  
平等覺

第六覺知：貧苦多怨，橫結惡緣；菩薩布施，等念怨親，不念舊惡，不憎惡人。

七 五欲過患覺

一作出家  
梵行覺

第七覺悟：五欲過患。雖爲俗人，不染世樂，常念三衣，瓦鉢法器，志願出家，守道清白，梵行高遠，慈悲一切。

八 生死熾然苦惱無量覺

一作大心  
普濟覺

第八覺知：生死熾然，苦惱無量；發大乘心，普

濟一切，願代衆生，受無量苦，令諸衆生，畢竟大樂。

### 三 結歎

如此八事，乃是諸佛菩薩大人之所覺悟，精進行道，慈悲修慧，乘法身船，至涅槃岸。復還生死，度脫衆生。以前八事，開導一切，令諸衆生，覺生死苦，捨離五欲，修心聖道。若佛弟子，誦此八事，於念念中，滅無量罪，進趣菩提，速登正覺，永斷生死，常住快樂。

註①四魔：指煩惱魔、陰魔、天魔、死魔。  
註②陰界獄：陰指五陰、五蘊；界指十八界。

大唐三藏法師義淨奉詔

譯

佛說無常經

佛陀教育基金會  
印贈



佛說無常經（亦名三啟經）

稽首歸依無上士	常起弘誓大悲心
為濟有情生死流	令得涅槃安隱處
大捨防非忍無倦	一心方便正慧力
自利利他悉圓滿	故號調御天人師
稽首歸依妙法藏	三四二五理圓明
七八能開四諦門	修者咸到無為岸
法雲法雨潤群生	能除熱惱蠲眾病
難化之徒使調順	隨機引導非強力

註①三四二五理圓明：三四指四念住、四正勤、四神足。二五：指五根、五力。  
註②七八能開四諦門：七八指七覺支、八正道。

稽首歸依真聖眾

八輩上人能離染

金剛智杵破邪山

永斷無始相纏縛

始從鹿苑至雙林

隨佛一代弘真教

各稱本緣行化已

灰身滅智寂無生

稽首總敬三寶尊

是謂正因能普濟

生死迷愚鎮沈溺

咸令出離至菩提

生者皆歸死

容顏盡變衰

強力病所侵

無能免斯者

假使妙高山

劫盡皆壞散

大海深無底

亦復皆枯竭

大地及日月

時至皆歸盡

未曾有一事

不被無常吞



上至非想處 下至轉輪王 七寶鎮隨身  
千子常圍遶 如其壽命盡 須臾不暫停  
還漂死海中 隨緣受眾苦 循環三界內  
猶如汲井輪 亦如蠶作繭 吐絲還自纏  
無上諸世尊 獨覺聲聞眾 尚捨無常身  
何況於凡夫 父母及妻子 兄弟并眷屬  
目觀生死隔 云何不愁歎 是故勸諸人  
諦聽真實法 共捨無常處 當行不死門  
佛法如甘露 除熱得清涼 一心應善聽  
能滅諸煩惱

如是我聞。一時薄伽梵。在室羅伐城逝多林給孤獨園。爾時佛告諸苾芻。有三種法。於諸世間。是不可愛。是不光澤。是不可念。是不稱意。何者爲三。謂老病死。汝諸苾芻。此老病死。於諸世間。實不可愛。實不光澤。實不可念。實不稱意。若老病死。世間無者。如來應正等覺。不出於世。爲諸眾生說所證法及調伏事。是故應知。此老病死。於諸世間。是不可愛。是不光澤。是不可念。是不稱意。由此三事。如來應正等覺。出現於世。爲諸眾生說所證法及調伏事。爾時世尊。重說頌曰

外事莊彩咸歸壞

內身衰變亦同然

唯有勝法不滅亡

諸有智人應善察

此老病死皆共嫌

形儀醜惡極可厭

少年容貌暫時住

不久咸悉見枯羸

假使壽命滿百年

終歸不免無常逼

老病死苦常隨逐

恆與眾生作無利

爾時世尊。說是經已。諸苾芻眾。天龍、藥叉、乾闥婆、阿蘇羅等。皆大歡喜。信受奉行。

常求諸欲境

不行於善事

云何保形命

不見死來侵

命根氣欲盡

支節悉分離

眾苦與死俱	此時徒歎恨	兩目俱翻上
死刀隨業下	意想並悼惶	無能相救濟
長喘連胸急	短氣喉中乾	死王催伺命
親屬徒相守	諸識皆昏昧	行入險城中
親知咸棄捨	任彼繩牽去	將至琰魔王
隨業而受報	勝因生善道	惡業墮泥犁
明眼無過慧	黑闇不過癡	病不越怨家
大怖無過死	有生皆必死	造罪苦切身
當勤策三業	恆修於福智	眷屬皆捨去
財貨任他將	但持自善根	險道充糧食

譬如路傍樹 暫息非久停 車馬及妻兒  
不久皆如是 譬如群宿鳥 夜聚旦隨飛  
死去別親知 乖離亦如是 唯有佛菩提  
是真歸依處 依經我略說 智者應善思  
天阿蘇羅藥叉等 來聽法者應至心  
擁護佛法使長存 各各勤行世尊教  
諸有聽徒來至此 或在地上或居空  
常於人世起慈心 晝夜自身依法住  
願諸世界常安隱 無邊福智益群生  
所有罪業並消除 遠離眾苦歸圓寂

恆用戒香塗瑩體

常持定服以資身

菩提妙華遍莊嚴

隨所住處常安樂

佛說無常經終